

3

# GRYP S MARTELLIUS.

*ILLUSTRIS., AC REVERENDISS.*

JOSEPHO MARIÆ

MARTELLI

ARCHIEPISCOPO FLORENTINO

*RECENS INAUGURATO,*

Dum in Templo D. JOANNIS Evangelistæ  
Collegij Societatis JESU excipitur,

*GRATULATIO.*



FLORENTIÆ,


---

Typis Michaelis Nestenus. MDCCXXII.  
*SUPERIORUM LICENTIA.*







*Lemma supra Templi januam .*



Si petis Exemplar Sacri Pastoris , JOSEPH  
Ipse dabit proprio in Stemmata , Seque simul .



*Pbrenoschema in Templo expositum .*



Aquila , & Leo ,  
Inter quos Archiepiscopi Insignia , Mitra , Litui , Cruces .

LE M M A .

*Sancti servabunt , ( ex Plin. )*

EXEGEMA .

Junge Leonē Aquilæ : Gryps en ! sacra Munera servans :  
SACRORUM hinc CUSTOS dicitur ille vigil .  
Quàm bene conjunctum , JOSEPH , ostendis utrunque !  
Stemmata , ut ANTISTES , pingeris ipse tuo .







# SACRI ANTISTITIS IDEA.

## O R A T I O.



Rumpe tandem ex animo, jure debita, diu concepta, ægrè cohibita Gratulatio. Stant Gaudiorum causæ. Pastorem habemus destinatum Superis, votis expetitum, precibus exoratum. Aspectabili jam Præsentiâ fruimur : Lucis haustu re-

creamur. Verùm enim verò [ Illustrissime, ac Reverendissime Præsul ] illud usuvenit in secundiore fortunâ, ut Lætitiz impotentia, Consilij habenas minùs audiens, plausus indiscriminatim prodigat ; ipsoque Amoris impetu abrepta, quodam quasi furore amabili, temerè effundat ; nihil admodum interesse arbitrata, cujusnam potius gaudium gaudeat, modò gaudeat. In hoc discrimen vocantur hodierna de Te Florentiæ Antistite Gaudia multò justissima. Scindit quodammodo semetipsam Voluptas ; uti se priùs referat, ambigens ; an meritæ Dignitati, an Merito Di-

gnitatis. Utrunque piaculum; si Piaculum sit, Amare. Nam si Vis Letitiz totam se Merito indulgeat tuo, haud illud tantidem fecit, quanti est: quasi enim statuit, abundè honestatum, nec Præmio ulteriore pensandum: sin prolixiùs incumbat in Dignitatem, altero semet obstrinxit crimine, quo vèl Ipse graveris absolvere: quòd nempe Honori gratulari minùs integrum sibi putet, quin tuas Laudes delibet, tuamque vèl Officio Modestiam violet; & Obsequij naturam per obsequia ipsa corrumpat. Itaque quòd me vertam nescio. Sentio autem, mihi Sequestro aliquo opus esse: eo videlicet, ut missà Dignitate, ac Personà, hodiernæ vestigal Gratulationis uni Publicæ Felicitati persolvam. Hic igitur esto, Auditores, modus Orationis meæ; non ut gratuler Præfui Dignitatem, quam ipse non prehensavit; non ut gratuler Præfulem Dignitati, licet hæc ipsum ambierit: sed ut *Perfectam Antistitis Ideam, Specimenque proponam in ipso Martellio Stemmata cognoscendum*: quo inspecto pronum sit unicuique colligere, quàm læta debeat e Præfule recens inaugurato Auspicia capere; & futuram incipiat jam nunc metiri Felicitatem.

Dux sunt potissimùm Laudes, Auditores, quæ Virum sacrâ Infulà dignum & faciunt, & probant; Vigilantia, & Fortitudo: altera perspicit Dignitatis officia, altera perficit. Neque verò earundem Ostensio negotiosa admodum provincia est: in ipsis Præfulis Nomenclationibus elucescunt. Nam si *Episcopum* dicis, quid nisi *Inspectorem* intelligis? *Archiepiscopum* verò  
 Prin-

*Principem Inspectorum* ? Hæc ipsa est notio Vocabuli ,  
 vel ab Atheniensibus olim usurpata eos *Episcopos* ap-  
 pellantibus , quibus Præfectura aliqua , aut Negotij  
 summa demandaretur : [ 1 ] quò sanè sensu Tullius ad  
 Pomponium Atticum scribens , *Vult* , inquit , *Pompe-*  
*jus , me esse unum , quem tota Campania Episcopum ha-*  
*beat* . [ 2 ] Si verò *Pastorem* nominas , quantà septum  
 Fortitudine animi esse eundem oporteat , tum ad No-  
 xia quæque a Grege sibi credito submovenda , tum ad  
 Salubria eidem accuranda , quotusquisque non vider ?

Has porrò Virtutes quò apertiùs paulò mentibus  
 subijciamus , gemino in Symbolo luculenter expres-  
 sas , in Regijs nempe , ijsdemque Mysticis Animanti-  
 bus , Aquilâ , & Leone , cognoscite . Et primò sanè  
 quid Aquilâ vigilantius , atque ad longè latèque oculis  
 pertingendum acutius ; quod proinde principem illam  
 Episcopi dotem expingat magis ? Hac enim Alite nul-  
 la sublimiùs evolat : opus ergo ei fuerat acerrimâ ocu-  
 lorum vi , ut *Profundissima quaque* ( quemadmodum  
 de eadem appositè dictum fuit ) [ 3 ] scrutari posset .  
 Talis commodùm & Episcopus : qui velut in editâ qua-  
 dam Specula constitutus Summam Rei sibi demanda-  
 tæ rite perspiciat . Quare æquissimo D. Clemens P. M.  
 sanxit Decreto , ut Antistes eminentiore in Solio resi-  
 deat ; [ 4 ] unde ceu Vulgo major inspiciat omnes , in-  
 spiciatur ab omnibus : intelligatque , Sibi , tanquam

A 4

Pa.

---

[ 1 ] Sarnel. to. 5. *Epist.* 20. [ 2 ] Cic. *Att. lib.* 7. ( 5 ) Emman. Thes.  
 ex Scip. Barg. [ 4 ] Hierolex. *Macri* .

Pastori vigilantissimo, suas Oves servandas. Quibusnam verò præditus oculis sit oportet, qui tam præcellens Sed e debeat circumspicere? utique Aquilinis; sacra scilicet Doctrinâ apprimè imbutis, atque emicantibus. [ 5 ] Sapienter proinde Græcæ Ritus Ecclesiæ, dum Episcopum consecrat, in Templi pavimento Civitatis effigiem, juxtaque Aquilam format; per quam Avem, Scientiam Diviniorem significans, admonet; tali eundem præsidio super Urbem, & Populos vigilantissimum fore. [ 6 ] Evolet sanè sublimè Præsulis Mens: sic condecet: Aquila est: humilia spernat; Cœlestia pertractet; Sole se toto impleat. Icon erit pulcherrima Præsidis Infulati: quodque Latinus Pindarus cecinit de Virtute, ad ipsum jure suo pertinebit.

*Virtus, recludens immeritis mori*

*Cælum, negatâ tentat iter viâ;*

*Cœtusque vulgares, & udam*

*Spernit humum fugiente pennâ. ( 7. )*

Enimverò sic Volare Vigilare est, Divinum haurire Solem, puriorem lucem ad excubandum potare. Quòd si Hierarcha Mitratus ( 8. ) sibi tam impensè Vigilantiam deponit, Virtutem alteram, nempe Constantiam, & Fortitudinem, remissiùs vindicabit? Si Doctorum Pontificum Maximum audio Gregorium, minimè gentium: disertè enim pronunciat,

*Opor-*

[ 5 ] Oportet Episcopum esse Doctorem. Tit. 3. [ 6 ] Hierol. Macri.

( 7 ) Hor. l. 3. Od. 2. [ 8 ] Hierarcha, sive Archiepiscopus, græca

vox ( idest Summus Sacerdos, vel Sacerdotum Princeps ) varietatis ergò posita.



*Oportere eos, quibus Divinus Grex sit concreditus, magnâ cum Constantiâ vigilare.* (9.) Quis igitur mihi obstrepat asserenti, eundem, præter Aquilam, Leonis Symbolo significari, cujus germana proprietas est Fortitudo cum Vigilantiâ coniuncta? Nunquam ille quidem non excubat, cujus vel somnus pervigil est; frustra tamen excubiturus, ni Leo sit. Quare in more positum illud scimus, ut pro Templorum vestibulis Leo utrinque marmoreus, tanquam excubitor, non tamen ut otiosus spectator, sed ut validus Propugnator, effingeretur. Hinc penes probatissimos Auctores pro *Sacris Custodis* Emblemate usurpatur:

*Est Leo, sed Custos, oculis quia dormit apertis:*

*Templorum idcirco ponitur ante fores.* (10.)

Imago Antistitis non inficianda; incassum tamen futuri alacris ad excubias, si minus acer fuerit ad tutelam; Sique Vigilantiâ quidê servaverit, non item Fortitudinem Leoninam. Hanc sanè Virtutem in Episcopo usque adedò implicatam cum alterâ, colligatamque fateri necesse est, ut eam Divinorum Interpretes Codicum quasi Primas tenere statuant, ea Pauli verba explicantes: *Non dedit nobis Deus spiritum timoris, sed Virtutis.* (11.) Virtutis, inquit, græcè *Δουλέως*, idest Fortitudinis. Siquidê vi sacri Ordinis conferuntur Episcopo necessariæ quidê virtutes, in primis tamen Inviictum Animi Robur, quo furorem possit a Grege, &  
ter-

---

(9.) Jo: Ep. Const. dist. 8. c. *Oportet*. (10.) Theat. Vit. Hum. tit. *Leo ex Alciat*. (11.) 2. *Timoth.* 1. *Cor.* 2. Lap. hic.

terriculamenta hostium propellere . Utrâque Præsul conflatus Virtute poterit jure suo Salomonis in Solio , Divini Solij Typo, inter duodecim Leunculos aureos , Protepiscoporum , idest Apostolorum Symbola , residere ( 12. ) : licebitque Ægyptios contemnere , Leonem Mitratum in Obeliscis suis ostentantes [ 13. ], cum potiore Episcopus jure , Divini Custos Ovilis , *Mitratus Leo* appellandus videatur .

En ! Auditores , veram Speciem , & Ideam Protomyſtæ , quam sub ipſum Orationis limen propoſui contemplandam . Ad vos jam pertinet , Exemplum cum Archetypo , alternis veluti obtutibus , comparare : quo veſtram poſſitis Felicitatem non fallaci conjecturâ deprehendere . Ad Præſulem rite conſtituendum , Aquila , & Leo , myſticâ ( ut diſputatum ) ratione conjungi debent . Nunquid conjunctos nō intuemini ? Vigilantiam illam Animi , additâ Ingenij perſpicacitate , ac divite cenſu Doctrinæ ( 14. ) [ cujus locuples teſtis vèl ipſa Aquila modò fuit , Romana ſcilicet , atque adedò Innocentiana ; INNOCENTIUS nempe XIII. quem diu ſoſpitent Superi , atque ſuperſtitent ] Vigilantiam , inquam , Antiftitis noſtri ſuo ſemper  
Ope-

---


( 12. ) Lauret. Silv. Alleg. tit. Cathed. ( 13. ) Kirk. in Obel. Flamin. ubi apparet Leo cum Virg. facie Mitratuſ ( al. Sphinx. ) Numinis Rerum Præſidis Hieroglyphicum . ( 14. ) Quam ſit vèl ad eloquentiam informatuſ , teſtantur , inter cetera , Coll. Ptolem. ubi etiam tum Adoleſcens Princeps in Re Literaria fuit : & Flor. Academia vulgò *della Cruſca* , ubi ætate maturior Archiepiſcopatuſ geſſit .

Operi intentam excubantemque, nusquam deviam, nusquam evagantem; tum perpetuum illum integerrimæ Vitæ tenorem, Morum gravitatem, Mentisque pondus sibi semper constans, nunquam discors; Vimque illam, & Energiam, in omni quidem Spartâ, præsertim verò Laurentianâ, gerendâ, ornandâque, præsentissimam: hoc, inquam, prænobile Virtutum Par, Principe Viro dignum, Mitrato Præfuli germanissimum, quod nullâ veriùs Imagine, quàm Regijs illis Animantibus, exhibetur, an non oculis vestris in tanto Heroe suspexistis?

Quòd si vèl e Gentilitijs Familiarum Insignibus futura æstimare fas est [ cur verò sit nefas, cùm certissimæ Notæ sint, quòd nobiliores, eò Sanguinis generosioris, & ad Grandia properantis? ] quid de MARTELLIORUM Stemmata pervetusto, ac generosissimo \* aliud poterat humanitus enunciari? An non, cùm Aquilam, & Leonem diximus, Gentem Martelliam adumbravimus? Gryphem videtis; hoc est Aquilam commodum, & Leonem in unum conjunctos: quos ipsos Ideam Antistitis præstituimus, qui Divinas Oves, Opesque rite custodiat. Non enim temere visum est tam nobile Symbolum tantæ Familiæ attributum, temperante sic Numine, velut Sacris Dignitatibus destinatæ: siquidem Gryps penes Auctores omnes pro SACRI CUSTODIS Notâ atque Schemate usurpatur. ( 15. )

Quæ

Quæ cùm ita sint, Auditores, si Idea illa, Species-  
que Præfulis, quam statuimus, geminâ potissimum ex  
Virtute conflata, Vigilantiâ scilicet, & Fortitudine,  
geminæ pariter Animantis Symbolo expressis, Aquilæ,  
& Leonis; si hæc, inquam, Idea in nostro Antistite  
mirum in modum conjuncta, suffragante præfertim  
Doctrinâ, comite Gravitate, deprehenditur; ad eo ut  
vèl in Gentilitio ejusdem Insigni elucescat, Ipseque  
ad Ecclesiasticos natus Apices, imò datus divinitus  
plusquam humanitus, videatur: quænam exinde  
Felicitatis Auspicia [ id quod Orationis hujus fuerat  
Institutum ] capienda sint, pro vestrà sapientiâ  
judicate. Utique [ quid enim? ] lætissima, ubi omnia  
ad tantum Heroem constituendum mirâ consensione  
conspirant. Jam quid superest exiendum? Non ut  
eam Felicitatem jam nunc e Præfule plena luce erumpentem  
clariùs inspiciatis: nam quis non perspicit? non ut  
Præfulem ipsum Felicitatis Auspicem ex intimo sensu  
adametis: nam quis non diligit? sed ut illam Superi,  
Pastoremque diu proprium suis Ovibus velit, nisi  
cùm Pastor futurus sit Plenioris Ovilis.



\* Gens Martellia [cujus Gentile Stemma Gryps  
semper fuit, ut ex antiquis ejusdem monumentis li-  
quidò constat] [a] in Florentinâ Ditione lato olim  
Do-

---

[a] Geminos Malleos aliquando addidit pro Phrenoschemate, &  
ad Parergon Stématis, aliarum Famil-exemplo, non verò pro Stémate.

Dominatu prænobilis, Florentiam ante seculum x i i i. transfertur. Vexilliferos ( vulgò *Gonfalonieri*, supremam in Rep. Dignitatem ) censet novem; Priores triginta: Florentinos Senatores octo, Romanum unum, Comites Palatinos tres: inter complures Hierosolymitanos Equites, duos Pisarum Priores, Baruli ( vulgò *Barletta* ) unum, Messanæ unum: inter plurimos Equites Ordin. S. Steph., sex Urbini Balivos [ quem Dignitatis locum hæc ipsa Familia fundavit ] præter alios bene multos Militari, & Ecclesiasticâ Dignitate insignitos, inferiùs numerandos: Illustris prætereà Cognatione non cum præcipuis modò Patriæ Familiis, præsertim cum Cosmo I. M. E. D., sed & cum exteris quoque magni nominis; cum Domo Fabiâ Romanâ, Adornâ Genuensî, Condulmeriâ Venetâ, cum Noceti Dominis, cum Fortebraccio Perusîæ, & Umbriz Domino, qui idem Capuz Princeps, & Magnus Neapolis Comestabilis; & cum Cæsare Estensî Mutinæ Duce.





PHRENOSCHEMATIS  
EXPLICATIO,  
PROBLEMATUM  
SOLUTIO.

Dialogus

SOLLICITUS, ET CALLIDUS

ACADEMICI SIDEREI;

*Academicis alijs deinceps evocatis, & interloquentibus.*

*Sol.* **O** Qui inter ceteros Rhetoricæ Alumnos,  
Minervâ tibi ingenium limante, facile  
emines mentis acumine, Academice,  
Callide; tu velim Phrenoschema hic in propatulo  
collocatum, quatenus rectius paulò, ac spinosius  
videtur, evolvas planius.

*Cal.* Prolixo animo tibi obsequor, Academice Solli-  
cite;

cite: quando hac re institutus sum a Magistro: Aquilam, & Leonem vides. Compluscula quidem sunt in hisce contenta. Per alteram Urbs Roma, quin & INNOCENTIUS XIII. P. M., quorum Insigne Aquila est; per alterum verò Florentia, cujus Insigne Leo: rursus per Aquilam, & Leonem, Vigilantia, & Fortitudo, Virtutes in sacro Antistite, ut modò audisti, pernecessariæ, significantur. Per subiecta verò Infularum, ac Lituorum Insignia Sacrum Florentinæ Principatum Ecclesiæ de præfacili intelliges.

*Sol.* Hactenus de Phrenoschematis Corpore, quod appellant; tametsi scrupulus nescio quis adhuc residet animo: nam Rhetor noster edocuit, unum ac simplex illud esse oportere.

*Cal.* Non continuò si unum, semper unum materiariâ unitate Schematis, sive Figuræ, modò sit unum, Unitate Mentis, & Finis. Quare Symbolum illud non incelebre Academiæ Concordium, tria exhibens Horologia, Rotale, Sciatericum, Arenarium, cum lemmate *Tendimus unâ*, ab Auctoribus probatissimis non improbatur. (1.)

*Sol.* Quod ad Corpus attinet Phrenoschematis, fecisti tu quidem satis: jam facessamus ad Lemma: *Juncti servabunt*.

*Cal.* Non licet credere, tam agresti te esse, ac plumbeo ingenio, quin scias, sejuncta hæc duo, ac dispa-

spa-

sparata componere. Si enim Roma, ac Florentia in Præfulem eligendum amico foedere, & consensione conspirent, quid, rogo, existeret, nisi Vir Ornatissimus, qui hoc possit Dignitatis fastigium, ac decus factum rectum servare? Rursus fac, in hoc Amplissimo Heroe Vigilantia copuletur cum Fortitudine [ quas Aquilæ nos, & Leonis Symbolo delineavimus ] quàm præclarè suam Spartam ornabit ! Denique [ quò primùm spectavit Phrenoschematis mens ] ex hisce Animantibus in unum conflatis quid efficiatur, tibi, ( 2. ) ut opinor, non latet.

*Sol.* Utique Gryps: cujus prior forma Aquilina, posterior verò Leonina est; a minore Virgilio, Baptista Mantuano sic explicata: *Nam Gryps est Animal duplex; Aquilamque figurat Pars prior, in Libycum transit postrema Leonem.* ( 3. ) Verùm iste quò pertinet?

*Cal.* Nempe quia allegorica Imago sacri Præfulis est.

*Sol.* Quid ita?

*Cal.* Quid ita, rogas? Responsio non facit ad omnem stomachum. Mercurialium mentium bolus est; cujusmodi hæc lectissimorum Virorum Corona: non enim ignorant naturam, & indolem hujus Feræ.

*Sol.* Ediffere. & mihi hanc indolem, ut ego quoque censear inter Doctiores.

*Cal.* Gryps, si qua fides Herodoto, Philostrato, Pausanix,

( 2 ) Hanc esse latiniorem Syntaxin, docent Grævius exemplo. Cic. 1. Cat. Franc. Sanct. Minerv. l. 11. Jo! Margin. voc. *Sapere*.

[ 3 ] Bapt. Mant. lib. 4. Agelar.



sanæ, Plinio, Ctesias, Solino, Cassiodoro, alijsque non sordidis Auctoribus [ 4. ], esto fabulosus alijs existimetur [ 5. ] habet hoc proprium, ac peculiare, ut Aurum, ac Gemmas, quæ in Hyperboreis Plagis, Indicisque effodiuntur, a prædonibus asferat, eaque vigilantissimè, fortissimèque custodiat. Proinde Gryphus [ 6. ] suo prope jure *Custodis* nomen, & quidem *Sacrorum Custodis* obtinuit. Quare, ut ante templorum fores, tanquam Vigilantiæ Typus, ac Fortitudinis, collocaretur, mos olim invaluit [ 7. ] Quodnam igitur verius potuit Præsulis Symbolum excogitari? Quodd si quispiam, nunquis aptius per hoc, quàm Illustris, ac Reverendis. JOSEPH MARIA MARTELLI exprimat, cujus avitum Insigne GRYPs commodum est, ut ad sacri Principatus Fasces natus quodammodo videatur, ipsumque agnoscere prope liceat in Stemmate pictum suo? Igitur, ut omnia summatim colligam, si prædictæ Animantes, Leo, & Aquila, junctæ fuerint, ut junctæ sunt, quæ studiis Urbium, & consensione Principum, quæ Naturæ provisu, quæ Stemmate Gentilitio, quid inde existet, nisi Vis quædam Rebus sacris servandis, custodiendisque peridonea; videlicet hic idem ex incly-

B

tâ

---

(4.) Ripa Iconol. p. 1. Plin. l. 7. c. 2. Ctesias l. 19. c. 94. (5.) Gryphas existere, de Fide divina est (ex Levit. 10. 13.) licet non cujusmodi hic describuntur: sed Aquilarum genus maximum sunt. Cor. a Lap. hic. (6.) Gryps, & Gryphus Plinio. (7.) Aldr. de Gryp. tit. *Mythica*.

tà Martelliorum Domo FLORENTINUS ANTI-  
STES? quæ quidem universa subiecto Exegemate  
comprehensa sunt.

*Junge Leonem Aquila : Gryps en ! Sacra Munera servans :*  
*SACRORUM hinc CUSTOS dicitur ille vigil.*

*Quàm bene conjunctum , JOSEPH , ostendis utrunque !*  
*Stemmata , ut ANTISTES , pingeris ipse tuo .*

*Sol.* Tametsi mihi abs te profiteor factum satis , ansam  
tamen mihi datam sentio nonnullarum quæstiuuncu-  
larum ex tuâ doctrinâ , dum exhibes , tacitè subna-  
scentium : perinde ac si dixerim , *Gryphus Gryphos*  
*vocarvit .*

*Cal.* Video , mi Sollicite , quorsum eas : Ingenium  
simul tuum demiror . Nunc jam possumus invicem  
transnominari : tu enim Callidus , qui Callidum  
captiosè sollicitas in Problematis . *Gryphus* , ais ,  
*Gryphos vocarvit* : & unâ struis . Vis nempe ut dissol-  
vam ? Nulla in me mora . *Gryphi* [ vocabulo fortas-  
se ab implicatione , nexuque geminæ Animantis in  
unam derivato ] appellantur *Ænigmata* salebrosio-  
ra , non ea quidem in se ludricâ , & jocosa , sed se-  
riâ , & graviori ; quorum enodatio curam studiumq;  
impensius requirit . Auctores [ si quid credimus Athe-  
næo ] Aristonomus , & Cleon . Hæc olim ab Ægy-  
ptijs , Babylonijs , Israelitis , inter pocula propone-  
bantur . [ 8. ] En ! igitur , quo pacto tibi *Gryphus*  
*Gryphos vocarvit* : *Ænigmata* , & frequenti *Gryphis*  
mentionem suborta , gestis intexere . *Sol.*

*Sol.* Divinaſti : neque enim id fore extra chorum  
[quod dicitur] in tanta Solennitate .

*Cal.* At qui ſi Sphingem egeris , OEdipos naſtum te  
puta ; Academicos Sidereos . Adeſte . Tu verò  
agedum incipe .

*Sol.* *Leo-aquila a Leone , & Aquilâ excipi debet .*

*Cal.* Grypiſma hoc [ 9. ] aſſutum expedi , Academi-  
ce *Subobſcure* .

*Sol.* Quanquam Davus , non OEdipus ſum , meipſum  
tamen exacuam . Leo-aquila nihil aliud , quàm  
Gryps . Gryphem dixi ? Sacrum Præſulem audiſti .  
Ne verò id abſonum videatur . Nam , ſi olim pro  
Romani Pontificis Schemate aſſumptus fuit , addi-  
tâ Epigraphe *Undique Princeps* ; ( 10. ) ut innuere-  
tur videlicet per gemina hæc Regia Animantia ge-  
minum ejusdem regnum , Sacrum , & Tempora-  
rium : rurfus ſi idem ad Chriſtum quoque Servato-  
rem ſignificandum traducitur , quòd duplici conſtet  
Naturâ , Divinâ , & Humanâ , ( 11. ) quotuſquiſq;  
nobis ſupercilioſus Ariſtarchus obganniat pro An-  
tiſtite , & hujusmodi Antiſtite , uſurpantibus ?

*Sol.* Baſilicè ! Perge porrò .

*Sub.* Jam verò præſens Antiſtes , ad ſacros eveſtus Fa-  
ſces , a Leone , nempe Florentiâ , & excipiendus  
perhonorificè , & exceptus eſt . An non excipien-  
dus itidem & ab Aquilâ ?

B 2

*Sol.*


---

( 9. ) Ap. Aldrov. de Gryp. ( 10. ) Piccin. Mund. Symb. l. 4.  
Symb. 364. [ 11. ] Aldr. l. 10. de Gryp. tit. Meralia.

**Sol.** Quænam verò ista ?

**Sab.** En ! Eadem circumspicis Jo: Evangelistæ, qui Aquilæ typo significatus, & *Aquila* per sacros Interpretes dictus: nimirum quemadmodum Aquila recto intuitu ad Solem, sic & Joannes, D. inquit Augustinus ( 12. ) ad Dei Verbum intuendum elevatus est, ut alius nemo altiore indagine sit Mystica perscrutatus. Huc adde quodd & Aquila & Leo tantâ fide sociantur, ut, ad idem jugum pariter junctos Ezechiel olim viderit Divinæ Gloriæ currum trahentes. ( 13. ) Sed omnia in pauca conferamus.

*Gryps Leo, Gryps Aquila: excipiet Leo, & Ales, ubi alma Flora, & Joannes Te gremio excipiet.*

**Cal.** Eugepæ ! visus Panthomates, omnium sciens. Perge, Sollicite.

**Sol.** Dic, quibus in terris, & eris mihi magnus Apollo, Penniger est Quadrupes, Penniger & Quadrupes.

**Cal.** Academice Umbrose, has umbras elucida.

**Um.** Locus iste ( cui dubium cadit ? ) est Sidereorum Academia, nostræque Gymnasium Rhetoricæ; cuius in fornice pictus cernitur Alatus Quadrupes, nempe Pegasus, una cum Fonte Heliconio. Cujusnam verò munere impensisque depictus, quæritis? Gentis Martelliæ; nempe FRANCISCI; qui idem nostri Antistitis Patruus; jam tum nostræ Rhetoricæ Alumnus, postmodum Corinthius Archiepisc., Patriarcha Hierosolymit., & apud Polonos Nuncius

cius Apostolicus, demum in numerum Purpuratorum Patrum adscitus; Rom. Purpuræ Splendor, Martellæ Familæ Gloria, nostri Collegij Decus, Patriæ totius Honos amplissimus: ad cujus insignis Promeriti monumentum perenne jure suo in nostro Lyceo substat Pegaso ejusdem Gentile Stemma; ac proinde Alato Quadrupedi Alatus Quadrupes. Neque id sanè temere: quàm bellè enim convenit Gryphi cum Musis! Gryphas Apollini sacrauit Antiquitas; ejusque Currui adiunxit. (14.) Et sanè in Numismatis vetustissimis Gryps cum Apollinis jam Capite, jam Tripode cernitur. Hinc duo rite confice: alterum, meritissimè Domum Martelliam, Gryphem suum ad Pegasum adstituisse, quæ tot inclytis Viris Musarum, & sapientiæ amicis effloruit: (15.) alterum ad nostram Academiam, spectare potissimum, tantum Præsulem celebrare, cujus Familæ Decora, tantæque Liberalitatis lux & imago ob oculos semper nostros versantur.

*En! quibus in terris, & sum tibi magnus Apollo,  
Penniger est Quadrupes, Penniger & Quadrupes.*  
*Sol.* Sapienter, & quasi Pegasus recens ingenio. Iam adeste animis ad hunc Gryphum.  
*Leo, & Aquila inter Sidera: num Leo-aquila inter Sidera?*  
*Cal.* Hic enim verò pertinet ad Sidereos. Ades, Academicæ Sublimis.

B 3

Sabl.

---

(14.) Aldrov. de Gryphe. (15.) Viri e. Domo Martellia Poeti, doctrinaque illustres recensentur sub Dialogi finem ad Asteriscum \*

*Subl.* Adsum. Longè quidem seiuncta Sidera, Leo, & Aquila: ille Signifero in Circulo, five Zodiaco, hæc in Galaxiâ. Sedenim, cùm sit Leo stellis quatuor, & quinquaginta compactilis, [ 16. ] Aquila verò undecim, sicubi novum Schema Sideris detegatur, quod utrunque numerum, contineat, quis veter, Leonem-aquilam, nempe Gryphem, in Sidera cooptari? An non cooptata in recentia est, præter alia, Crux in Ventre Centauri ad Australem Plagam? an non recentius Crucifer Clypeus Sobieschius ad Borealem? an non & Sextans Uraniz inter Craterem, & Hydram? ( 17. ) Et Gryphem igitur in Sidereum Album referri, quis invidet?

*Sol.* Cedo tandem quatuor & quinquaginta Stellas e Domo Martellia, queis novum sit fas in Cœlo Sidus coagmentari.

*Subl.* Detecta crede: Gens enim Martellia quatuor, & quinquaginta Stellas enumerat, quâ Doctrinâ prælucidas, quâ Fortitudine Animi, quâ Prudentiæ laudè, quâ Ecclesiasticâ Dignitate, quâ Sanctimoniz gloriâ ( 18. ) Noster interim Præsul laudes complexus omnium, in terrestri clarescit Ecclesiæ Cœlo, postmodum ævo, ut apprecamur, ac meritis gravis, superis in Sedibus suo Sideri nomen daturus. Quæ universa, mihi aurem vellens Uranie, monet, præstius ut circumscribam.

*Est*

---

[ 16. ] Ex Lexico Math. Hieron. Vitalis. ( 17. ) Ex Planisph. novissimo Doppelmayr. ( 18. ) Horum nomina ad Dialogi calcem vide sub Asteriscum \*

*Est Aquila in Cælo, est Leo: Qui complexus utrumque  
In sese, a Cælo GRYPUS tamen unus abest.*

*Cum vigil ANTISTES, fortisque refulserit, olim  
Cætu in Sidereo GRYPUS quoque celsus erit.*

*Cal.* Sublimiter pro tuo Nomine, proque Academico  
Sidereo!

*Sol.* Prosequamur. Nilum vidi in Sexto Signo exaltatū.

*Cal.* Gryphus hic quidem certè plusquam Laconica  
Scytale est. Aquilinum poscit ingenium. Evolve  
ambages, Academice Acute.

*Ac.* Hisce involucris nihil aliud, nisi me fallit animus,  
præter Nostri Nomen Antistitis, adumbratur: idèd  
non tam Gryphus iste, quàm Logogryphus; &  
quasi Ægyptium Hieroglyphicum est.

*Sol.* Ediffere.

*Ac.* Nilus analogicè Gryps, ænigmaticè JOSEPH.  
Sextum Signum, idèst Virgo in Zodiaco, symboli-  
cè Magna Deipara (19.), cui Nomen est *Exal-*  
*tata*, hoc est MARIA [20.] Nilus igitur in Sexto Si-  
gno quid erit nisi JOSEPH MARIA MARTELLI?

*Cal.* Explana singula.

*Ac.* Gryps Leo-aquila est: Leo-aquila & Nilus: Ni-  
lus ergo analogicè Gryps est. In primis Nilus *Aerës*  
idèst *Aquila*, nuncupatur, ipsaque Ægyptus *Aëraa*  
hoc est *Aquilina*: quare Aquila Nili est Hierogly-  
phicum.

B 4

*Cal.*

---

[19.] Chrys. Dalm. Soc. Jes. Mund. Marian. disc. 33. Arabes vix.  
signum exprimunt Virginem cum Pueri in sinu. Ex Albumazar.  
[20.] Inter alias, MARIE significationes. Una est *Exaltata*.

*Cal.* At unde Nilo *Aquila* nomen inditum?

*Ac.* A cursus velocitate, & alvei altitudine. [ 21. ]

*Cal.* Quamobrem verò Nilum *Leonem* vocitas?

*Ac.* Leonis quoque Hieroglyphico Nilus exprimitur; sed Nilus accrescens: quòd Sol, ubi Leonis Signum ingreditur, Nilo Aquarum incrementum largiatur: crescit autem eò usque dum Sol ad Virginis Signum pervenerit: tunc residit. ( 22. ) En! igitur, quamobrem Leo-aquila Nilus sit, sed Nilus accrescens. Quid verò JOSEPH, si Etymon consulis, nisi ACCRESCENTEM, significat? In Nilo igitur usque ad Virginem augescente JOSEPHUM MARIÆ Nomine auctum non ne vides? quæ cum sit EXALTATA, quin & Exaltans, atque, ut D. Germanus ait, *Exaltatio Exaltationum* [ 23. ] quid inde fas conjectare, nisi Præsulem nostrum ad Ecclesiasticos Fasces in principe Urbis Templo MARIÆ sacro exaltatum, ulterius fore [ ut bona spes est ] exaltandum?

*Cal.* Profundè ut Nilus, acutè ut Aquila, fervidè ut Leo. Nunquid præterea, Sollicite?

*Sol.* Dissolvite & hoc Problema. *Gryps succedit Ancilibus.*

*Cal.* Tu lacefferis, Academice *Audens*, ad hoc Rete Vulcanium extricandum.

*And.* Nulla mora in Audente. Duo per hoc *Ænigma* indi-

---

[ 21. ] Diod. Sic. l. 1. c. 2. ( 22. ) Herodotus 100. die. [ 23. ] S. Germ. ferm. Præf. Deip.



indicantur : alterum quidem , quòd VII. Idus Martij Florentinus Antistes Romæ sit designatus : alterum verò quòd maximum in eodem sibi Præsidium Florentia situm intelligat.

*Cal.* Adhuc caligo . Explica rem uberius .

*And.* Sensim , & gradatim omnia . Non te fallit , opinor , Romæ olim quotannis Ancilium Festa solita celebrari ; cum videlicet hæc collisa circumferebantur a Salijs , haud sine tripudio : quòd in uno ex illis putaretur Urbis Præsidium constitutum . Hæc verò Solennitas eo ipso die VII. Idus Martias peragebatur , quo die JOSEPH MARIA MARTELLI Protomytha Florentinus est renunciatus . Cùm igitur ipsum Florentia instar Aræ sibi præsentiat futurum , & veluti sacrum sui Gregis Ancile , non Aquilæ modò , ut Clypei Romanorum ( 24 ) sed Aquilæ-leonis effigie auspiciatius insculptum , nonne superstitionis Ancilibus Gryps sanctior successit , hoc est JOSEPHI MARIA , Ancile , Præsidiumque certissimum Populi Florentini ? Hanc equidem reor mentem Enigmatistæ .

*Sol.* Verè dicis ; neque a scopo aberrasti . Sed advertite animos ad hoc Problema . *GRYPS emendans Quinquatria.*

*Cal.* Nodus enim verò Gordianus , ad quod exolvendum Alexandri gladio opus sit . Te hic poscit locus , *Academicæ Occulte.*

*Occ.*

*Occ.* En! ego dicto audiens. Sub Quinquatrium Festa, Romæ quondam in Minervæ honorem celebrata, dabantur in obsequium ejusdem Gladiatorum ludi; die videlicet XI. Kal. Apriles; qui dies emendatus utique pulcherrimè est, ejusque superstitio ejerata, secundùm alias rationes, per Inauguratum Præfulem Florentinum. Devovendus autem, & ad sanctiorem ritum transferendus per Gryphem mysticum videbatur. Gryps enim fuit olim a Græciâ suæ Palladi dictus sacer: & in Arce Atheniensi [ si Pausaniam audimus ] ( 25. ) simulacrum erat Minervæ, in cujus Casside Grýps utrinque sculptilis cernebatur. Nunc verò meliori Minervæ, hoc est Deip., sacratius addicitur, dum noster Antistes, eo ipso die Tiaræ auctus honore, ad suæ Dignitatis Possessionem in primatè Florentiæ Templo adeundam jus acquisivit.

*Sol.* Acu rem tetigisti. Obelisco dignus es, & plusquam Clypeo Argivo. Sed adhuc Ænigma unum.

*Abstiste, Lemures: Gryps adest.*

*Cal.* Latebra sanè, præquam credi potest; inopinabilis? Ingenio hic usus est tuo, Académice

*Viride.* Omnium quantum est hominum acutissime, siquidem expedieris!

*Vi.* Quin imò hoc Facili reor facilius nihil.

*Cal.* Bene habet! Authorasti fidem tuam: exauthorabis.

*Vi.* Solennem hic inspicio, quam Præsul noster in Æde Maximâ adiit, Possessionem. *Sol.*

*Sol.* Id ipsum oppidò perplexibile est.

*Vi.* Nonne hæc per eos dies adita, quibus olim Lemuria, hoc est Sacrificia a Romulo adversus Lemures instituta? [ 26. ] Putabantur enim Lemures, sive Larvæ, concursare noctu per domos, & Civium quietem inturbare. Ad eos porrò abigendos juvenes armabantur.

*Sol.* Quid nobis, o Vivide, profanis cum Ritibus jam antiquatis?

*Vi.* Quasi verò, Sollicite, Christiano Gregi veriora Spectra circumundique non insultent, Error, Superstitio, Fraus, Flagitia: quæ pretiosorem Animi tranquillitatem, Fideique perturbant. Huic, tutandæ nam quid præsentius, quàm mysticus Gryps? Quemadmodum enim hoc Animal Aurum attingentibus maximè infestum est, atque, ut Poëta canit, *Unguis, & rostro, atque alis armatus in hostem*, suas mirè opes defensat: sic noster Antistes Intelligentiâ, veluti Alis, tum Eloquio, & Exemplo, Ecclesiæ Thesauros eatenus tutari occœpît, ut quidquid eisdem infensum occurrat, se priùs detrusum persentiat, quàm nociturum. Intelligentiam novimus, Eloquium audivimus, ( 27. ) Exempla intuemur. Nam Pugna hæc, atque adedò Victoria, & Triumphus, peractus tum rite est, cùm Præsul

Am-

( 26. ) Hæc v. r. Idus Maij, tam v. tum x. x. sic alternis fiebant.

( 27. ) Reverendiss. Can. Franc. Tornaquinci, Eccl. Cath. Archid. nomine totius Capit. peroravit: Ad quem Illustriss. ac Rev. Archiep. egregia oratione respondit.

Amplissimus solenni pompâ , frequentissimoque totius Urbis concursu Templum ingressus plus mille facibus irradiatum , sacrum veluti Capitolium , Stygias Larvas non tam abegit , quàm triumphavit . Eius Aduentu asserita Salus : in portu res est : tranquilla omnia : regnat Pax ; ardentque vota , & spes omnium , ut regnet diù . Vin' hæc strictim , & circuncisè ?

*Gryphus adest : Lemures absistite : Crimina , Fraudes , Templum Prasul adit : cedite ; Gryphus adest .*

*Cal.* Maeste esto egregie Juvenis singulari eruditione , & ingenio ! Verùm semper ne ego Auditor tantùm ? Disce tu quoque , o Sollicite , Gryphos dissolvere , è que Sphinge in OEdipum immigrare .

*Sol.* In quovis loco me , Callide , paratum puta .

*Cal.* *Ex Igneis alatis alatus Ignis .*

*Sol.* Verè Sphinx locuta est : tentabo tamen . Nihil hic aliud involvitur , præter Amorem ; & Amorem reciprocum inter Antistitem , & suum Gregem .

*Cal.* Qui tandem ?

*Sol.* Hic quoque GRYPUS sublatet ( & percommodè quidem : nos enim in uno Gryphe Martellio huc usque versati , ab eodem latum unguem discedere non debemus ) . Gryps igitur , cùm ex Leone , & Aquilâ coalescat , totus constat ex Igneis : ignita est enim Leonum , & Aquilarum natura . Nam quid Aquilâ igneum magis ? vèl hinc intelligi potest , tum quòd omniù sit Avium vivacissima , tum quòd Pennæ Aquilinarum alienis commistæ illas calore suo deterant ,  
atque .

atque suburant. [ 28. ] Nam de Leone quid dicam ? quem Ægyptij pro Ignea vi Solis accipiunt [ 29. ] Macrobius planè igneum , deque naturâ Solis confirmat ( 30. ) quin imò ex ejus ossium collisu [ teste Æliano ] non secus ac e filice, Ignis excuditur. ( 31. ) Ergo & Gryps , qui ex utroque concretus , totus Igneus erit : idcirco etiam pro Ignis , & Ætatis Symbolo adhibitus ( 32. ) . Quàm appositè igitur Symbolum sit & Amoris ; qui & Ignis fingitur , & Alatus ? Qui quidem Amor , si cujusquam , certè pingitur in suo GRYPHE nostri Amor Antistitis in Populum Florentinum .

*Cal.* Hactenus Amorem Præfulis video : mutuum Populi Amorem non video.

*Sol.* Placido tenore Optatis tuis respondebimus : primum est enim hunc ratiocinatione colligere : siquidem Amor Amorem parit : mirèque facit in hanc sententiam Emblema illud sanè ingeniosum Joachimi Camerarij [ 33. ] . Inter cetera Leonem pinxit , & Aquilam ex adverso se respicientes , subiecto lemmate : Ο' Ερως ε παντων αιτιον , κη προς αυτον ε παντα . idest Amor causa omnium , & ad ipsum omnia . Itaque , cùm Salus universorum e nostri Præfulis Amore derivetur , quis dubitet , an idem Amorem omnium conciliet , in seque reciprocet ? Habes igitur tui sensum Ænigmatis : *Ex Igneis alatis*

---

( 28. ) Aldr. Ornith. lib. 10. [ 29. ] Horkel. l. 1. Hier. 21. [ 30. ] Macrobi. Saturn. l. 1. ( 31. ) Aldrov. de Gryp. tit. Mystica . ( 32. ) Ibidem . [ 33. ] Cent. 2. de Symb. Anim.

*sis alatus Ignis: idest Ex Amore Amor.*

*Cal.* Pereruditè! Jure idèd in Academicos Sidereos adlectus, qui seu Sphingem, five OEdipum agas, visus in utroque Cæsar.

*Sol.* Par est jam, & Interpretationi meæ, & Gryphis nostris, Colophonem imponere.

*Cal.* Prome de penu tuâ Musis aliquid, & Apolline dignum.

*Sol.* *Ignis Amor: Gryps est Ignis: venit Ignis ab Igne: Ergo ab Amore venit rursus & alter Amor.*

*Hac tua Laus, o Gens Martellia. Stemmata quantum. Ipsa tuo victrix Instar Amoris habes!*

*En! Flamma ut! Gryphem cingunt: ut! purpurat Ignis. Ille Rubor Flamma est: Flamma sed ipsa Amor est.*

*Cunctorum at JOSEPH legit Ignem, cogit Amores: Colligit ex Atavis, colligit ex Patriâ.*

*Ignibus at tot concretus, tot Amoribus, band est Prasul Amans, verum (credite) Prasul Amor.*



- \* 1. Censentur ex Familiâ Martelliâ Poëtæ insignes quinque a Mino Florent. celebrati: *Ludovicus, Vincentius, Guillelmus, Nicolaus, & Sigismundus.* Viri omnigenâ Literaturâ illustres, præter Illustriss. ac Reverendiss. JOSEPHUM MARIAM Archiep. Florent., duodecim: *Hugolini* duo, duo *Dominici*, duo *Vincentij*, tres *Ludovici*; tum *Braccius, Franciscus, & Aloysius* Societ. Jesu, ingenio, & literis humanioribus præstantissimus. 2.

2. Laude bellicâ inclyti; nempe Generales Præfecti bellici, Generales Classium Præfecti, Rei tormentariz Præfecti, complurium triremium Domini, ac Duces, alijque Duces insignes, sunt, *Bartholomeus, Nicolans, Baccius, Braccius, Laurentius, Camillus, Dominicus, Jo: Franciscus, Ferdinandus, Pandolphus, Ludovicus, Fridericus*, duo *Petrî*, duo *Antonij, Vincentius, & Martellus*.
3. Ecclesiasticâ Dignitate conspicui, *JOSEPH MARIA* Archiep. Flor., *Franciscus* Archiep. Corinth. Patriarcha Hierosolym., Nuncius Apostol., & S. R. E. Cardinalis; *Hugolinus* Episc. Lupien. & Narnien., *Jo: Baptista* Episc. Joppen., *Hugolinus* Episc. Glandeven., *Ludovicus* Episc. Clusin., *Braccius*. Ep. Fesulanus.
4. Re Politicâ illustres, videlicet Legati ad Principes, Respub., Reges, Cæsares, *Dominicus, Rupertus, Nicolai* duo, *Hugolini* duo, duo *Braccij*, tum *Petrus, Baccius, Franciscus, & Marcus*, Eques S. Steph. & Baliu. Urbini.
5. Vitæ Probitate, vel Sanctimoniâ clari, *Hilarion Hugolinus, Braccius, Alexander, Marcus, Vincentius*,





# J O S E P H

## FLORENTINI GREGIS PASTOR

### E C L O G A.

*MELIBŌEUS, CHROMIS, PALÆMON, Pastores,  
NEARCHUS Vates.*

- M.** **O** Divūm facer Interpres, cui Mystica rerum  
Se retegunt, penitūsq; animis Impervia nostris  
Cuncta patent : hinc Pastorum nutantia corda  
Consilijs sæpe ipse tuis, atque omine firmas,  
Magne Nearche : leva titubantes pectore curas.  
Hūc adsum ; mecumque Chromis, seniorque Palæmon;  
Quos nova suspensos rerum Portenta fatigant .
- Ç.** Per Superos oro, perque hoc spirabile lumen,  
Per Geniumque tuum, latebrosos disijce nexus .
- P.** Evolve, precor, ambages, sensusque latentes :  
Sic tibi fatidicā mentem Deus impleat aurā,  
Nec lapsura fides unquam tua Dicta refellat .
- N.** Dic, Melibœe : Deus ( nam labitur omnis ab Alto  
Lux animis ) Deus ille dabit referare latebras,  
Si qua manet. *Me :* Vidi in prato cum Matribus Agnos  
Pascentes latè per Lilia. Pastor at illinc  
Longè aberat : soli pubentia germina, soli  
Carpebant, solis teneri cum matribus Agni.

Lan.



Languebant tamen ah ! Matres , Agnique nivales  
 Languebant ægri . Scires Pastore carentes .

N. Scilicet ipse, Ovibus novit quid præstet alendis  
 Conscius, ipse Agnis quæ credat pabula , Custos .  
 Nam , quanvis sint læta oculis alimenta , sub illis  
 Sæpe aconita latent , & non innoxia victu  
 Gramina . Pastor amans potiores seligit herbas :  
 Ducit poturos ad flumina : præcavet æstum :  
 Defendit dirumque gelu , morsusque pruina .  
 Pastoris vox nota Gregem , vox ipsa sequacem  
 Delinit , mulcetque suæ modulamine Avenæ .  
 Noscit Oves bene quisque suas , & noscitur illis :  
 Væ ! solis . Aderit Leo fortè , Lupique rapaces  
 Discerpent . Me : Quin hoc ipsum mirabile visum ,  
 Et monstri simile est nobis , o care Nearche .  
 Nam medias inter pecudes Leo fortè cubabat  
 Innocuus , circumspectans : sensusque patere  
 Si possent , visus miseras doluisse relictas .  
 Cùm subito intonuit rugitu ; maxima longè  
 Cui juga , cui colles responsavere supini .  
 Ad vocem accitus summis de montibus ecce !  
 Pastor nescio quis , sed adest venerandus : at illi  
 Obvius ipse Leo se fert ; frontemque , jubasque  
 Submittens , Adventantis vestigia lambit .  
 Exiluire hilares per florea prata Bidentes .

Quid Portenta velint , ediffere : discute nubes .

N. Omina læta cano , Thuscis & candida Regnis .  
 Pastor adest , longum Populi Votum : ipse Latinâ  
 Qui modò ab Arce redux hilarat clarissimus Arnum ,  
 Aspectuque beat . Quos Lilia conspicias inter  
 Pascantes niveis niveos cum Matribus Agnos ,  
 Florentina suo Pubes lætissima Flore est .  
 At quid in Etrusco pateat , nisi Flora Leone ?  
 Ipsa oculis Clives aspectat amantibus ; Ipsa ,

Rugitu patrias curas confessa ; fidelem  
 Pastorem , Civemque suum, Patremque vocavit .  
 Audiit : & , notæ monitus Telluris amore ,  
 Advenit tandem ; & carum suscepit Ovile .  
 Tunc Leo Tyrrhenus festivis obviavit  
 Plausibus ; & tanto gaudens gestivit ALUMNO .

M. O Grex , o Pubes fortunatissima tanto  
 Pastore ! en ! Urbem stat pergere ; ibique sacris  
 Provolvi pedibus ; sanctique Oracula Patris  
 Accipere. *Pa.* Ah ! Socioſne tuos, Melibœe, relinques ?  
 Nos quoque ( ſit tanti mora parva ) ſequemur euntē .

C. Pauxillum expectare decet ; dum noſtra Nearchus  
 Rite recognoscat Viſa , atque Arcana reſolvat .

N. Dic, *Chromi. Cbr.* Vidi Aquilam nuper de Tybridis oris  
 Ad ripas Arni volitantem ; & grandibus alis  
 Supra Agnos in valle , & Oves , Oviumque Magiſtros  
 Tendere iter , longos & circumſlectere giros .  
 Nec ſatis : at roſtro niveam geſtabat obunco  
 Membranam notulis inſcriptam : quas mihi Damon  
 ( Nanque ego vix elementa ſciens connectere prima )  
 Damon Poſtores inter doctiſſimus unus ,  
 Explicuit , Chartæ ut manibus data copia noſtris ,  
 AUGUSTUS VENIT CUSTOS . Tum Regius Ales  
 Pagellam elabi in medium permiſit Ovile .  
 Dein trinos iterans ſuper æthere celiſor orbes ,  
 Avolat ex oculis , tenues dilapſus in auras .

N. Nonne vides , aliâ expreſſum ſub imagine ſacrum  
 Pastorem ? Pater Auſoniâ quem ſummus ab Arce ,  
 Nomen ab INNOCUIS traxit qui Moribus , & qui  
 Reginae Alitum generoſo Stemmata gaudet ,  
 Miſit in Etruſcos fines . Non fallor : eundem  
 Ipſa Avis altivolans designat : at illa Papyrus  
 Atque Characteres Paſtoris Nomen adumbrant .  
 Nam , niſi me vani fruſtra docuere Parentes ,

Quod

\* Quod sonat AUGUSTUS linguâ nostrate, & JOSEPH,  
Nomen Idumæum, si rite vocabula pendas,  
Id sonat: AUGMENTUM nimirum intellige. Tusca  
Plaude igitur Tellus, & tanto Præside gaude:  
Scilicet augetur iam nunc tibi candida semper,  
Candidiorque Fides, & Honos, atque aurea Secula.

C. Nos fortunati, quos tam felicibus annis  
Vivere Fata sinunt, atque Ora Augusta tueri!

N. Jam tua tu (monet hora) renarres Visa, Palæmon.

P. Compuleram pecus in silvam, ut defenderet æstum,  
Flammiferamque Rotam: cùm Fagum ecce! omne sub  
Annosam, ingentem, se sponte coëgit: & illud, [unam,  
Quod mirere magis, surrecto attollitur ore  
Culmen in arboreum, defixis luminibus stans.  
Obstupui: & cupidus rerum cognoscere causas,  
Aspicio dictuque novum ac mirabile Monstrum.  
Anne Aquila? at Quadrupes. Leo? verùm hic penniger  
Mistum utroq; genus video, corpusque biforme. (Ales.  
Sed nullæ sub fronte minæ, nil lumine torvum.  
Quin & subiectos Agnos gaudebat, Ovesque  
Despectare, suasque super proferre pennas.

N. Mira refers, nec mira tamen. Proh tarde Palæmon  
Et senio, & mente immemori! nunquamne vetustum  
Etrusci audisti JOSEPHI Stemma? Leonem  
Unâ Aquilamque vides, Animantia Regia: neuter  
Est, & uterque simul; vero sed nomine GRYPUS est.

P. Nunc repeto: clarumque Genus narrare solebant  
Pastores nostri. Me. Quin propter splendida Facta  
Dicebant, tantæ hæc olim data Symbola Genti.

N. Quid si CUSTODEM sacri spectetis Ovilis  
Stemmata descriptum proprio? Pa. Majora profaris

C 2

Quip-

---

\* *Augustus* ab *Augustu*, vel *Avium* gestu. Hinc etiam ad rem *Amplam*,  
majestatisque plenam significandam extenditur. (*Thef. ling. lat.*)

Quippe, Nearchē, fide. Ne. Quænam sunt, dicite, privæ  
Custodis laudes? Me. Puto sunt Vigilantia, Robur:  
Prospicit hac, illo concedita Munera servat.

N. Hæc ipsa aligero coniuncta in Gryphe videte.  
Fortius hoc nihil est, nihil & vigilantius; Aurum  
Sive velis, seu jam Gemmas defendere: vulgò  
Propter eam meruit CUSTOS audire. Cbr. Sed istuc  
Impletum satis esse putem; tot nempe feruntur  
Hac de Stirpe Viri, vastæ qui Robore Mentis  
Rem Florentinam servarunt. Ne. Scilicet illos  
Rere satis? Gryphem vel quovis munere dictum...?  
Non: sed SACRORUM est CUSTOS. Tu proinde vi-  
Ante Aras passim Gryphes, ac Tempia locatos. (debis

P. Audivi tamen a senibus, si vera loquuntur,  
Fesuleo quondam sub Monte fuisse Menalcham  
Ex Gente hac, Vittis clarum, sacrisque Tiaris,  
Pastoremque Gregis magni. Sic Omen avitum  
Credimus esse ratum. Ne. Sedenim num Fesula tantæ  
Virtuti fines, atque ultima limina ponat?  
Magna Domus majora creat: & crescit cundo,  
Ceu Flumen maria alta petens; sibi concolor usque,  
Principiisque suis, celso neque degener ortu.

C. Si poscis majora, Lycon majora reponet:  
Ipse Togâ nuper Latîâ, roseoque Galero  
Spectandus, Tiberim meritis claravit, & Arnum.

N. Hi quoque nimirum promittebantur Honores.  
Aspice enim, quanto Gryps interlucet in Ostro!  
Sed non ille color lentescet: Purpuraque Ostium  
Altera fortè audit, respondebitque vocata.

M. O Superi faxint firmata hæc tempore nostro!

N. His tamen auspicijs non tam Romana Lacerna;  
Quàm tu respondes, Grex Florentine, Tiarâ.  
Stemma Leone velut conflatur, & Alite, amico  
Sic utrunque Animal JOSEPHUM lumine signat.

Ro-

Romulea hunc Aquila indulſit : Leo Tuſcus eundem  
 Quâ prece non adiit , queis non & amoribus aſtit ?  
 Nec ſpectatur adhuc proprio ſub Stemmate pictus ,  
 Dum CUSTOSSACER , & titulo conſentit in omni ?

- P. Tale tuum nobis Reſponſum , doctè Nearchè ,  
 Accidit , exuſtas qualis recreare Bidentes  
 Fluminis unda ſolet , cùm findit Sirius agros .  
 Quis dignas referat tanto pro munere grates ?
- C. Non opis eſt equidem noſtræ. *Me.* Tibi præmia reddant  
 Cœlicolæ. *Pa.* At nos , o Socij , properemus ad Urbem.
- N. Veſtræ addar comes ipſe viæ , comes addar honoris .  
 Attamen haud fas eſt vacuis accedere palmis :  
 Ipſe feram gracili fragrantia poma caniſtro ;  
 Et ſpargam circum violâ , calthâque , roſâque :  
 Parva quidem : tamen ipſa decent : hiſ pingitur Ipſe ,  
 Qui cunctis floret maturus laudibus , Heros .
- C. Aſt ego lactea dona dabo cum melle recenti :  
 Iſta decent : nihil eſt Paſtore ſuavius illo .
- M. Agnus de grege lanigero pulcherrimus unus  
 Eſt mihi , colla gerens rubro circumdata mello :  
 Ipſe , manum patiens , ſequitur quocunque vocatus .  
 Iſte decet : mitis nam Paſtor , mitis ut Agnus .
- P. At mihi ſunt geminæ in teſtis ſine labe Columbæ :  
 Vincunt Argentum , vincunt candore Liguſtra .  
 Hæ decuere Patrem , innocuis qui moribus , illæ  
 Ceu ſunt innocuæ : ſua erit charis huic quoque Dôno .
- N. Rumpite jamque moras . *Pa.* Sed tu prior ire memento  
 Sacratum ad Solium , fandî qui doctior : & nos ,  
 Ac noſtra officia exhibeas . *Ne.* Ego vertice prono ,  
 Voſque unâ , Patrem venerabimur . Offeret inde  
 Quiſque ſuâ ſua Dona manu . Dein nomine veſtro ,  
 Nomine rite meo , partum gratabor Honorem ,  
 Communeſque Urbis plauſus , Populique , Gregiſque :  
 Pollicitus tum noſtram operam , tenueſque labores ,  
 Te-

Testabor Superos , Diurnæ tempora Vitæ  
Indulgere velint . Flexo tum poplite quisque  
( Ad normam nunc rite meam se fingere discat )  
Aut jungat palmas , digitosve interplicet , aut sic  
Stet cancellatis ad pectora curva lacertis :

Dicatque : *O sacer Antistes Bene fausta precare .*

- M.* Addam ego : In abruptis Agni mihi saltibus errant :  
Nec vigili fas est oculo pertingere ad omnes .  
Dic bona verba , Pater , jam nunc , precor , auspice dextrâ ;  
Ne fiant miseri grassantum præda luporum .
- C.* Subijciam : Turrita colunt mea tecta Columbæ :  
Lactea terga illis , frons lactea , lactea colla .  
Dic bona verba , Pater ; faustoque has omine serva ;  
Ne ferus accipiter miseras trahat ore cruento .
- P.* Ast ego : In Arnensi surgunt mihi Lilia Valle :  
Chloridi Sidereæ devovimus . O Pater , almo  
Tutare auspicio ; ne gens inimica revellat ,  
Ne turbo allidat , raptive e nubibus imbres .
- N.* Hunc ritum memores servate : deinde , Sacerdos  
Quæ dextrâ sanctus sublatâ impertiet , omnes  
Procurvâ accipiant divina Charismata fronte .
- P.* Res bene procedet . *Me.* Cuncta ex sententiâ . *Cbr.* Eamus .

## EUCHARISTERION.

**T** Imebant Aquilam , & trucem Leonem  
Agni , Oves , Ovium quoque & Magistri :  
Nam ferox rapit illa , raptat iste :  
Junctam nunc Aquilam suo Leoni  
Agni , Oves , Oviumque amant Magistri :  
Nam servat vigil iste , servat illa .  
Laus certè unius est tua hæc , JOSEPH .  
Prò in jure Aquilæ venis in Ædem ,

Quæ

Quæ juncta est quoque Mystico Leoni. \*  
 Nos grates tibi plurimas habemus ;  
 Deque hoc Munere millies te amamus.

\* In Curru Ezechiel Proph. ut supra dictum est.



## C A N D I D E L E C T O R.

**M** Onitum te volo . Si qua offenderis in hisce lucubrati-  
 bus , quæ Ethnicum sapere videantur , cujusmodi sunt  
 Nomina Fatæ , Fortunæ , Deorum , & similium , eatenus  
 eadem ab Auctore usurpari , quatenus vel Poëtica sunt ,  
 vel ita fert usus vetustioris Latinitatis . Ceterùm , si Ca-  
 lamus Poëticus , Animus Catholicus est .

## HIERONYMUS PHOEBEI

### S O C I E T A T I S J E S U

### In Provinciâ Romanâ Præpositus Provincialis

**C** Um Librum , cui titulus GRYPUS MARTELLIUS ,  
 a P. Josepho Scapecchi nostræ Societatis Sacerdote con-  
 scriptum aliquot ejusdem Societ. Theologi recognoverint ,  
 & in lucem edi posse probaverint , potestate nobis a R. Pa-  
 tris Michaelis Angelo Tamburini Præposito Generali ad id  
 traditâ , facultatem concedimus , ut typis mandetur , si  
 ita ijs , ad quos pertinet , videbitur . In quorum fidem has  
 literas manu nostrâ subscriptas , sigilloque nostro munitas  
 dedimus . Maceratæ die 23. Junij 1722.

Hieronymus Phœbei .

ACA-

# ACADEMICORUM NOMINA.

*ORATIONEM RECITAVIT.*

Abbas Acursius de Riccis.

*INTERLOCUTORES IN DIALOGO.*

Abb. Aloysius del Sera, Cosmus del Sera, Abb. Aloy-  
sius Strozza, Canonicus Rudolphinus Venuti,  
Eques Leo Ricafoli.

*ECLOGÆ PASTORES.*

Eques Philippus Corboli, Philippus Gondi, Anto-  
nius dell' Ancisa, Raphael Minorbetti.

*EUCHARISTERION EXHIBUIT.*

Carolus Scarlatti,

